

Umsögn um drög að reglugerð um hrognkelsaveiðar 2020 .

Sveitastjórn Kaldrananeshrepps þakkar fyrir að fá tækifæri til umsagnar, en harmar framlögð drög sjávarútvegsráðherra að reglugerð um hrognkelsaveiðar 2020.

Lýst er furðu yfir því hvernig vegið er að einni af grunnstoðum atvinnulífs sveitafélagsins án nokkurs samráðs við undirbúning málsins og sveitarstjórn óttast afleiðingarnar verði reglugerðin samþykkt óbreytt. Áhrif reglugerðarinnar munu fyrst og fremst bitna á smærri sjávarbyggðum sem hafa átt í vök að verjast undanfarna áratugi. Ákvæði reglugerðinnar eru því ekki í samræmi við áherslur ríkisstjórnar í byggðamálum.

Allt útlit er fyrir að atvinna muni tapast, tekjur sveitarfélagsins og íbúa þess skerðist verulega, öryggi sjómanna minnki vegna breytts fyrirkomulags þar sem ljóst er að fækka muni í áhöfnum. Fyrir 2013 var teinalengd um 3.500 m á hvern sjómann og gátu 3 sjómenn verið á bát, sem gerir heildarlengd 10.500 m á bát með þremur á. Í reglugerðar-drögunum er gert ráð fyrir 3.750 m á bát, sem er 65 % samdráttur af teinalengd frá 2013 og 50 % frá seinasta ári. Því er ljóst að gert er ráð fyrir að aðeins einn maður sé hverjum bát, sem er óásættanlegt út frá öryggissjónarmiði.

Þá mun atvinnuöryggi stórskerðast, enda verður erfiðara að tryggja sjómönnum heilsársvinnu hjá minni útgerðum. Hrognkelsaveiðar eru grundvöllur fyrir rekstri minni útgerða sem eru hryggjarstykki í atvinnulífinu í Kaldrananeshreppi og víðar.

Sveitarstjórn hefur einsett sér að verða eitt af leiðandi sveitarfélögum í umhverfismálum á landsvísu og telur að um mikil neikvæð áhrif verði fyrir atvinnugreinina ef reglugerðin verður samþykkt óbreytt. Það er nokkuð ljóst að vegalengdir á miðin breytast ekki við reglugerðina og tíðari sókn til að draga færri net eykur kolefnisspor atvinnugreinarinnar sem um munar, með meiri olíu brennslu. Telja verður að það sé í hrópandi mótsögn við aðgerðaráætlun ríkisstjórnarinnar í loftslagsmálum 2018-2030 og Parísarsamkomulagið.

Sveitarstjórn Kaldrananeshrepps.

Arnín Óladóttir, Eva Katrín Reynisdóttir, Finnur Ólafsson, Halldór Logi Friðgeirsson og Margrét Ólöf Bjarnardóttir